

Htawm tem' ri tuil' ri Tí'mó'se eun ok' keuhti

¹ Htawm ti ok' aen' na ko', meuh uí Paw'lu meuh peue caee Eun Yesú Hkrit kopti meuh a leukah' tuil' Eun Peucawó Cawó teum'kawm htut e' lawtpon ná maeé' Yesú Hkrit Cawó meuh vang keutuí hpum' e' ná Eun,

² uí tem' ri tuil' a ri Tí'mó'se ku' meuh kon' uí neum-neum hk'a'naee hk'a' yum' ná mi.

Kah mun' sin', hk'a' tukyak maeé' hk'a' kuit nyawk' kuit sam'ran cumyen' lih neum Kuing' Peucawó maeé' neum Cawó Yesú Hkrit e' ná kue' ri mi reu'.

Uin' sati ri peue Guil leukah' ritroe un' cawp' na' ce

³ Seun' ku' tawn lah' uí ri mi yam kaw uí heul' nang kuing' Masido'ni' ná, uí kah mi suip ri kuit' nang veng E'fé'su' ná punta kaw mi tuil' leukah' un' laee kah peue sangsawn' leukah' hk'a' yum' un' cawp' ngon' ná ce suip ri sangsawn' a baeé' ná, ⁴ maeé' un' laee kah peue cui'cam' leukah' apom leumah' ná maeé' leukah' ceucat lah' ri suip ri ing' un' kue' vang sut' vang euc' ná. Aen' ce meuh a ku' yeuh peue htuh'ting' puri, a hkuin' meuh ku' kaw yuk kan' Eun Peucawó ku' pucti lih neum hk'a' yum' ná. ⁵ Vang keutuí hpum' ka leukah' tuil' mi ri ce ná a meuh hk'a' leumeus'keus ku' lih neum hpum' seunga' seungawm, hpum' cang yawng maeé' hk'a' yum' caetcaet ná. ⁶ Peue ngon' ná tecla peue ceu nang aen' ce. Ce hpawt' ri lah' lawng ku' un' kue' mun' ná ri puri. ⁷ Ce sum' meuh peue Guil leukah' ritroe ná, daecti ce un' yawng ku' buih lah' ri ná maeé' ku' buih hkam' htawhkam ce ná.

⁸ Peue lawn lo' leukah' ritroe ná' cawp' hk'a' ri heul' ko', yawng é' leukah' ritroe ná' chak' ka. ⁹ E' jaen yawng leukah' ritroe ná' un' tang' a ri uin' ri pun ce peue leupaws seumeu' ná', daecti tang' a ri uin' ri pun peue un' hot' ritroe, pun peue kleuc' ritroe, pun peue un' yawng Peucawo' Eun, pun peue map', pun peue un' seunga' chak', pun peue un' kue' satsana, pun peue toh makuiing' ri, pun peue toh peue, ¹⁰ pun peue len'cu, pun me taw' me pleh puri, pun peue paing' peue, pun peue cang chí'lai, pun peue hkam' sa'hki' ku' un' kue' un' meuh maeé' pun ku' seubu ham'tap leukah' leupaws seumeu' ná'. ¹¹ Ceu nang aen' ce a cawp'maen leukah' mun' ren'kawn munhpung' keuting Eun Peucawo' mun' keuting ná'. Leukah' mun' ren'kawn aen' a ap ri ri uí'.

Mun' Peucawo' tuil' Eun ri Paw'lu eun

¹² Mun' keuting ri Cawo' é' Yesu' Hkrit Cawo' tuil' kaw'ring uí' ná' Eun. Kopti sawn' Eun uí' kati keutawn', Eun uin' uí' yeuh mhai' ri. ¹³ Uí' saec' tawn lah' ku' un' nawpsang Eun ko', keunhap' nokneh peue yum' Eun ná' ce maeé' yeuh ku' lheu' reng ce nanggal' aen' na, daecti kopti yeuh uí' a maeé' un' nang yum' un' nang yawng ri a, Eun tuckyak ri uí'. ¹⁴ Mun' Eun Peucawo' é' Yesu' Hkrit ná' maeé' hk'a' yum', hk'a' leumeus'keus kue' hk'a'nae Eun ná' a buit ri lih nuknhen' ri uí'.

¹⁵ Punta Yesu' Hkrit kaw Eun teum'kawm htut peue map' ná' peue lawtpon ná', Eun lih pang bhen' keute' ná'. Leukah' aen' a meuh leukah' hk'o'yum' nyawk', htuk' ri un' laee kangkae rap ri ti a. Hk'a'nae peue map' ná' ce gawm'euc', meuh uí' peue map' keuting hk'ai' ce. ¹⁶ Daecti punta Yesu' Hkrit kaw Eun tuil' peue kaw yum' Eun, rap ri ti cit' tip a'yu tip cot'cu ná' kaw ce nyu hpum' cang yeun'hkam un' laee sut' un' laee euc' ri ná', uí' saec' ná' map' keuting hk'ai' peue ko', Eun tuckyak ri uí'.

¹⁷ Maet'maen', kah munhpung' cot'cu na' kue' hk'a' pang Hkun'haw'hkam' cot'cu, un' cang lulaic, peue un' cang nyu peue, meuh Peucawo' ti ton' na' Eun reu'. Amin.

¹⁸ Kon' ui' Tí'mó'se, kah ui' mi yeuh keutit' na' a cawp'maen leukah' ku' tawn tamnai lawng mi na'. Mi lawn hot' ri yeuh a heul' ko', mi kaw kaw'l'reng keuting ri peuing' suik'. ¹⁹ Jhawp' hk'a' yum' na' maeé' hpum' cang yawng na' reu'. Kopti ngon' tecla peue a, hk'a' yum' ce na' a cum' rai' heul'. ²⁰ Peue aen' ka, ka meuh Himeneas' maeé' Alek'sando'. Punta kaw ka rin ri ti lawng ku' kaw un' lah' ku' un' nawpsang Peucawo' Eun na', ui' ap ka nang dak ti ka Satan na' hawc'.

2

Sawn' lawng hk'o' mun'

¹ Kop awn' na nanggal' ka na', ui' sum' kah mi hk'o' mun', hk'o'hk'ang, mun' keuting ri Peucawo' Eun pun peue gawm'euc'. ² Punta kaw e' cang kuit nyawk' kuit sam'ran ut' cumyen' hk'a'naeé' vang hkopyawm' ri Peucawo' Eun na' maeé' vang a'yu im' chak' ri na', ui' sum' kah mi hk'o' mun', hk'o'hk'ang, suk'seun' Peucawo' Eun pun hkun'haw'hkam' maeé' peue kue' an'nya na' ce yeut. ³ Yeuh keutit' na' chak' ka. A htuk' hpum' Eun Peucawo' Cawo' teum'kawm htut e' lawtpon ⁴ ku' sum' kah peue gawm'euc' peue pun hk'a' htut lawtpon na' maeé' sum' kah peue yawng lawng ku' leupaws seumeu' na' Eun. ⁵ Kopti Peucawo' kue' Eun ti ton' yawo, saec' meuh nang seuna' Eun Peucawo' ri peue e' na' a kue' ti ton'. Eun meuh Yesu' Hkrit meuh peue na' Eun. ⁶ Eun hkam' ri sum tu' ri na' meuh ngos ka kaw Eun teum'kawm htut peue gawm'euc' na' peue lawtpon na'. Eun tuil' sa'hki' aen' a lih yam cawp' a yam ri na'. ⁷ Kop awn' na, punta kaw ui' hkam' sa'hki' ka lawng awn' na, Peucawo' Eun leuk ri

uin' uí' meuh peue sangsawn' leukah' mun', meuh peue caee Eun Yesu'. Buih lah' uí' ku' neum, hpaw uí' ca' chí'lai. Peucawo' Eun leuk ri uin' uí' meuh peue sangsawn' hk'a' yum' neumneum na' ri peue un' meuh peue ceu Yu'da na' ce.

⁸ Sum' kah uí' me ut' ku duih' na' ce yuk tí' seunga' chak' ri hk'o' mun' maeé' un' kue' ri hk'a' seungeueng' peulel maeé' un' kue' ri hk'a' htu'hting' puri.

⁹ Saec' meuh beun' na' ce, uí' sum' kah ce na' cuip' hk'eung buih hpaw maeé' ti hk'a' naee vang tang' ce hpum' ri nyom' jom tem yeuh a kuing'kon. Uí' hkuin' sum' kah ce glaing' huik' ri cuip' hk'eung hk'il', hk'eung saeng' maeé' hk'eung ngos heun' na'. ¹⁰ Daecti sum' kah uí' ce cuip' ku' chak' na' kuing' maeé' lah' ce ri meuh beun' hkopyawm' ri Peucawo' Eun na'.

¹¹ Beun' na' ce htuk' ri dit'ti rin ri ti hk'a' naee vang tang' ce hpum' nyom' jom tem ri na'. ¹² Beun' na' kaw ce sangsawn' peue maeé' kue' tí'ca an'nya hk'a' pang me na' ce, uí' hkuin' tuil' ahkvang ka. Ce kaw kah ri ut' dit'ti. ¹³ Kopti Peucawo' hpanpleng' Eun Adam eun nanggal', hawc' ko' Eun kawn' hpanpleng' E'va eun. ¹⁴ Lheú' awn' na, ku' leuceng ku' cop'long na' a un' meuh Adam eun, daecti a meuh beun' na' eun. Eun keut' ri meuh peue map'. ¹⁵ Daecti beun' na' ce lawn suip ri ut' hk'a' naee hk'a' yum', hk'a' leumeus'keus na' maeé' hk'a' seunga' chak' na' kuing'kon ko', ce kaw pun ri pon kopti keut' ce kon' na'.*

3

Nang rokso' muk kon' Hkrit

¹ "A'nhaw' lawn tang' hpum' ri kaw meuh nang rokso' muk kon' Hkrit ko', eun sum' yeuh kan' kue' munhpung'

* ^{2:15} 2:15 Kon' lah' ka na' lah' a Yesu' Hkrit Eun.

na'." Leukah' aen' a meuh neumneum. ² Nang roksá muk kon' Hkrit ná' kaw eun kah ri meuh peue un' kue' vang ri peue ri, kue' yawo beun' ti peue*, cang uin' sati ri, cang eut' hpum' ri, meuh nang kuing' ri hkopyawm', cang rap ri ti chec', cang sangsawn' peue seubu, ³ un' nyui ri yuic' ri plai', un' klawo' peue daecti hpum' onawn', un' ceuk kleuc' klaee' peue, un' leumeus' hk'il' leumuil. ⁴ Eun kaw kah ri u'peung pe nyahk'ul' ri meulamlam, kon'hk'i eun na' ce kaw kah ri leuceng hkopyawm' kuing'kon ri heun. ⁵ (A'nhaw' lawn un' cang u'peung pe nyahk'ul' ri meun ko', eun ci' kaw cang roksá muk kon' Hkrit Eun Peucawo' na' ce yeuh sa'nhaw'?) ⁶ Eun kaw un' kah ri meuh nang kaw'n yum' hk'u', a lawn un' yeuh keutit' ko', na' eun cang mhawng' ri hk'o'cuin, eun na' pun ri hkam' hk'a' taws' a'mu na' seun' seuca' rai na'. ⁷ Punta kaw eun un' cang pun ri hkam' hk'a' ri peue ri maeé un' hk'ui' nang hk'ai tung' ka seuca' rai na', eun kaw kah ri meuh peue kue' muis chak' nanggal' ce peue hk'a'nok muk kon' Hkrit ná'.

Nang teum'kawm muk kon' Hkrit

⁸ Saec' meuh nang teum'kawm muk kon' Hkrit ná' ce kaw kah ri meuh nang kuing' ri hkopyawm', hpum' leupaws seumeu', un' nyui ri yuic' ri plai', hpum' leupaws seumeu' ri hk'il' leumuil. ⁹ Ce kaw kah ri jhawp' vang rui' neumneum ka hk'a' yum' na' ri hpum' cang yawng na' meulamlam ri. ¹⁰ Caet ri nawk ce nanggal', ce lawn un' kue' vang ri peue ri ko', koe kah ce meuh nang teum'kawm muk kon' Hkrit ná' reu'.

¹¹ Seun' awn' na, beun' ce na'† ce kaw kah ri meuh beun' kuing' ri hkopyawm', un' cang peusah' nyoe peue, cang uin' sati ri, yum' pun hk'a'naee ku ceu.

* 3:2 3:2 A'ko' kati keutawn' maeé beun' ri † 3:11 3:11 A'ko' beun' yeuh kan' muk kon' Hkrit

¹² Nang teum'kawm muk kon' Hkrit na' ce kaw kah ri kue' yawo beun' ti peue[‡], kah ri u'peung pe kon'hk'i nyahk'ul' ri meulamlam ri. ¹³ Peue cang teum'kawm pun peue meulamlam na' ce kaw pun munhpung' ri heun'. Ce kaw pun kaw' reng hk'a' yum' ri Yesu' Hkrit Eun na' heun' bae.

¹⁴ Un' ling' uí saec' kuit kaw ri ing' ri mi, daecti uí lawn un' ing' ri mi vaevae ko', punta ¹⁵ kaw mi pun ri yawng ku' kaw htuk' ri yeuh ce peue nya peue hk'ul' Eun Peucawo' na', uí bai tem' ri tuil' leukah' sangsawn' aen' na ri mi. Peue nya peue hk'ul' awn' ce meuh muk kon' Hkrit Eun Peucawo' Cawo' a'yu im' na'. Muk kon' Hkrit na' a meuh kleum' rawng' mae' kleum' ka ku' leupaws seumeu' na'. ¹⁶ Vang rui' neumneum ka hk'a' yum' e' na' keuting a hk'ai' leukah' mhaing' na' ce gawm'euc'.

Aen' a meuh, Peucawo' puc Eun ri lih meuh tu' peue,
 Cit' seunga' na' a tuh' e' nyu hk'a' leupaws seumeu'
 Eun na' hawc',
 in'hpom na' ce nyu Eun,
 a kue' peue sangsawn' lawng Eun na' ri peue ceu ku
 ceu,
 peue bhen' keute' na' peue yum' Eun,
 Peucawo' Eun yuk Eun huk' nang munhpung' ri.

4

Leukah' tamnai lawng kaw peue tecla hk'a' yum' na'

¹ Cit' seunga' na' lah' ka a glih'gleueng' yeuhki', a lawn rot ti seunyi ko' kaw peue tecla hk'a' yum' na'. Peue kaw hot' cit' cang chi'lai na' mae' leukah' sangsawn' ka seuca' na'. ² Leukah' sangsawn' awn' a lih neum peue cang chi'lai, peue leukah' seunga' hpum' vok' ku' hpum' cang yawng ce yeum ka heul' na'. ³ Ce un' kah peue ti puri meuh beun' me

[‡] 3:12 3:12 A'ko' kati keutawn' mae' beun' ri

puri, ku' hk'a ti ri ceu ku' Peucawo' hpanpleng' Eun ri tuil' ri peue yum' Eun mae' peue yawng ku' leupaws seumeu' na' ce hk'a a hk'a'naee mun' keuting ri Peucawo' Eun na', ce un' kah peue hk'a a. ⁴ Kopti ku' Peucawo' hpanpleng' Eun na' chak' a ku ceu ri. Peue lawn rap ri ti a hk'a'naee mun' keuting ri Peucawo' Eun ko', un' lo' ri kam' a saec' ti ceu. ⁵ Kopti pun a ri saic' ri seunga' ri leukah' Eun Peucawo' mae' leukah' hk'o' mun' na' hawc'.

Mhai' chak' Eun Yesu' Hkrit

⁶ Mi lawn sangsawn' ec'awng' na' ce ri lawng aen' na meulamlam ri ko', mi kaw meuh mhai' chak' Eun Yesu' Hkrit, mi kaw huk'hawn' hk'a'naee hk'a' leupaws seumeu' ka hk'a' yum' na' mae' leukah' sangsawn' chak' hot' mi ri yeuh na'. ⁷ Pawlaee leuceng leukah' apom un' hkopyawm' Peucawo' Eun na' apom ris ka a'ya na', daecti hkviuk' ri cang hkopyawm' ri Peucawo' Eun reu'. ⁸ Hkviuk' ri yeuh nham' keune ri kue' kaw'reng na' kue' a mun' yeut, daecti hkviuk' ri hkopyawm' ri Peucawo' Eun na' a jaen kue' mun' hk'a'naee ku ceu. Kopti kaw a teum'kawm e' kue' a'yu hk'u' hk'a'naee civit cat aen' na mae' civit cat na' na'.

⁹ Leukah' aen' a meuh leukah' hk'o'yum' nyawk', htuk' ri un' laee kangkae rap ri ti a. ¹⁰ Htalikawm' hkam' e' ri sae'caee' yeuh kan' na' kopti meuh a keutui' hpum' e' Peucawo' Cawo' a'yu im' na' Eun. Eun meuh Cawo' teum'kawm htut peue gawm'euc' peue lawtpon na', Eun jaen meuh Cawo' teum'kawm htut peue yum' Eun na' ce lawtpon.

¹¹ Sangsawn' peue ri ceu nang aen' ce meulamlam ri reu'. ¹² Pawlaee uin' peue chaw hkamram ri meuh mi nang aet' na', daecti vang leukah' mi, vang yeuh mi kan', vang hk'a' leumeus'keus mi, hk'a' yum' mi mae' vang seunga' chak' mi na', yeuh mi meuh vang hot' rin ce peue yum' na'. ¹³ Rot ti yam na' ui' ing' rot, sae'caee' ri lip htawm

Seungá vang hk'o' mun', tuil' kaw'l'reng maeé sangsawn' peue. ¹⁴ Pawlaee vel lapsawng' Peucawó tuil' Eun ri mi ri leukah' ce peue suip leukah' Eun Peucawó yam muk ro'kan nang kawt ná' tang' ce tí ri hk'a'pang mi ná'.

¹⁵ Punta kaw peue cang nyu vang huk'hawn' mi ná', sae'caee' co'ca' ri yeuh kan' aen' na. ¹⁶ Uin' sati ri hk'a' áyu im' mi ná' maeé ku' sangsawn' mi ná' meulamlam ri. Yeuh a laleung. Mi lawn yeuh keutit' ko', mi ná' cang teum'kawm htut tu' ri ná' maeé peue pun ri mhawng' leukah' mi ná' ce lawtpon.

5

Ku' htuk' ri yeuh ri peue

¹ Pawlaee tup is' a'ta' kawt ná' ce nyawk', daecti hk'o'hk'ang a ri ce seun' meuh ce kuiing' mi ko'. Me kaw'n' aet' hk'ai' mi ná' ce yeuh a ri ce seun' meuh ce awng' me mi ko'. ² A'ya kawt ná' ce yeuh a ri ce seun' meuh ce ma mi ko'. Beun' kaw'n' aet' hk'ai' mi ná' ce, yeuh a ri ce hk'a'naee hpum' seungá chak' mi ná' seun' meuh ce awng' beun' mi ko'.

³ Teum'kawm áya seunao un' kue' nang roksa' ná' ce meulamlam ri. ⁴ Daecti áya seunao ná' ka lawn kue' kon' un' lah', lhan' un' lah', nanggal' ka ná' ce kaw kah ri rin ri yeuh ku' cawp' alo Eun Peucawó ná' ri roksa' ce nyahk'ul' ri ná' maeé top' ce kun makuiing' a'ta' áya ri ná'. Kopti yeuh keutit' ná', htuk' a hpum' Eun Peucawó. ⁵ A'ya seunao un' kue' nang teum'kawm ut' koe ná' ka keutuí hpum' ka Peucawó Eun. Punta Peucawó kaw Eun teum'kawm ka ná', ka sae'caee' hk'o' mun' hk'o'hk'ang a ri Heun gawm' sum' gawm' seunyi. ⁶ Daecti áya seunao ut' pal maeé ku' ren'kaw'n' ná', ka saec' ná' kaw'n' áyu im' ko', a seun' yeum ka hawc'. ⁷ Punta kaw peue un' cang chaw hkamram ce ná', sangsawn' lawng aen' na ri ce yeut.

⁸ A'nhaw' lawn un' roksá' ec'awng' ri, lheu' awn' na un' roksá' peue nya peue hk'ul' ri ko', eun meuh peue tecla hk'a' yum' na' hawc'. Eun rai nyawk' hk'ai' peue un' yum' na' ce.

⁹ A'ya seunao htuk' ri lec nang ca'lang' a'ya seunao pun ku' teum'kawm na', kaw ce kah ri meuh peue yeuh ki', kah ri a'yu leskul' neum pai', mae' tawn kue' yawo me ti peue*, mae' ¹⁰ kue' muis laws' hk'a'nae yeuh kan' chak' na', u'hpama ri ko', roksá' kon'hk'i ri, cang rap ri ti chec', hkuc' cung ce peue Eun Peucawo' na', teum'kawm nang tukhka mae' tan tu' ri yeuh kan' chak' ku ceu.

¹¹ Saec' meuh a'ya seunao kaw'n' nhum' na' ce, paw nang seué' ce lec nang ca'lang'. Kopti yam alo jawngkuí' tu' ku' sum' yeuh ce na' a lawn keuting hk'ai' alo jawngkuí' tu' tan ce ri Hkrit Eun na' ko', ce na' tang sum' is' me bae.

¹² Kop awn' na, kopti un' hot' ce kati yeuh ri nanggal' na', ce kaw pun ri hkam' hk'a' ciyang na'. ¹³ Lheu' awn' na, ce na' meuh peue keunah eo' ri ti nya hawc' ti nya. Keunah koe a hkuin' nang hk'o', ce na' eo' ri cuk'cic' suksak peue, lah' ku' un' htuk' ri lah' na'. ¹⁴ Kop awn' na, uí' sum' tuil' kaw'l'reng ce a'ya seunao kaw'n' nhum' na' ce na' ti ri is' me bae, kue' kon'hk'i, roksá' nyahk'ul' ri. Yeuh keuti' ko', ransu na' ce na' un' cang chaw hkamram ce. ¹⁵ Kopti maet'maen', a'ya seunao na' ce ngon' kleuc' ce hk'a' ri, ce hpawt' ri hot' Satan na' heul' hawc'.

¹⁶ Beun' yum' ti peue na' eun lawn kue' a'ya seunao nang nyahk'ul' ri ko', teum'kawm ce. Pawlae kah a meuh beus ri muk kon' Hkrit, kopti muk kon' Hkrit na' kaw ce cang teum'kawm a'ya seunao seubu ku' htuk' ri teum'kawm neumneum na' ce.

¹⁷ Ro'kan nang kawt yeuh kan' muk kon' Hkrit meulamlam ri na' ce, lheu' awn' na nang yeuh kan' sangsawn'

* 5:9 5:9 A'ko' kati keutawn' mae' me ri

leukah' mun' maeé kan' sangsawn' ná ce htuk' ri pun munhpung' ri lal' pun. ¹⁸ Kopti nang htawm Seungá ná lah' ka, "Pawlaee chuip' moeng ka a moe buih chok' chec' ngho' na'",[†] maeé "Nang yeuh kan' ná ce htuk' ri pun ngos yeuh ri kan'."[‡] ¹⁹ A lawn un' kue' peue hkam' sa'hki' hk'o' lal' loe' peue ko', pawlaee rap ri ti leukah' tang' peue map' ri ro'kan nang kawt ná ce. ²⁰ Peue yeuh map' ná punta peue seubu ná kaw ce un' cang hot' rin ri ti ce ná, sangsawn' ce nanggal' ce peue heun' ná reu'.

²¹ Tuil' uí leukah' aen' na ri mi nanggal' Eun Peucawó, nanggal' Eun Yesu' Hkrit maeé nanggal' ce in'hpom ku' Peucawó leuk Eun ná ce. Jhawp' leukah' sangsawn' aen' na ri un' meuh mi hk'a'mawn' hk'a'maen', pawlaee yeuh a maeé keue' mi ri buh peue.

²² Paw nang pao ri tang' tí ri tuil' an'nya ná. Pawlaee va map' ce peue seubu ná ceu' mi. Yeuh tu' mi seungá chak'.

²³ Tang' neum maet' maen' ná, pawlaee nyui leuum' ná palkoe. Kopti keuteul sui' keucu peuyhat mi ná, nyui leuum' pli' bui ná aet' aet' yeut.

²⁴ Map' ce peue ngon' ná puc a ri glih'gleueng', peue kaw yawng kaw ce hkam' hk'a' taws' a'mu ná. Daecti map' ce peue ngon' ná a kaw pucti hot'. ²⁵ Seun' awn' na, yeuh ku' chak' ná kaw a pucti glih'gleueng'. A saec' ná un' nang glih' maet' maen' ko', a hkuin' kaw mó ri pun.

6

¹ Punta kaw peue un' cang lah' ku' un' nawpsang ri muis Eun Peucawó ná maeé ku' sangsawn' e' ná, ku' leuvaee peue meuh mhai' ná ce htuk' ri hkopyawm' ri cawó ri ná ce meulamlam ri. ² Mhai' ku' cawó ce ná meuh ce peue yum' ná, kopti meuh ce ec'awng', ce htuk' ri un' va hk'a'

[†] 5:18 5:18 Saw'n leukah' mun' 25:4 [‡] 5:18 5:18 Lu'ka 10:7

hkopyawm' ce ri cawó ri ná' cutyawm'. Ce jaen htuk' ri yeuh mhai' chak' lheu' awn' na, kopti ku' pun mun' kop ku' yeuh ce mhai' ná' ko', meuh a peue yum' ku' mhai' ná' leumeus' ce ná' ce. Aen' meuh ce ku' htuk' mi ri sangsawn', kah peue hot' ri yeuh a.

Leumeus' leumuil

³ A'nhaw' lawn sangsawn' leukah' hk'a' yum' un' cawp' ná' maeé' leukah' un' hkaw leukah' cawp'maen sangsawn' Eun Cawó' e' Yesu' Hkrit ná' maeé' leukah' sangsawn' Eun Peucawó' ná' ko', ⁴ eun meuh peue hpum' keuting pil kui' ri un' leuceng pun keunhaw'. Eun sae'caee' htu'hting' peue ri leukah' leupong, a yeuh hkoé'mang' puri, rutrim' puri, peusah' nyoe puri, htanghteum' puri ⁵ maeé' un' htuk' un' lung ce peue hpum' hk'aw'jeuk ná' pucti lih. Ce meuh peue un' kue' hk'a' leupaws seumeu'. Ce hteum' yeuh kan' Eun Peucawó' ná' meuh hk'a' kaw sok ri pun nammaet leumuil ná'.

⁶ Daecti peue yeuh kan' Eun Peucawó' maeé' nyu ku' kue' ri hit' hpum' ri ná', meuh a nammaet keuting. ⁷ Kopti yam ing' e' pang bhen' keute' ná', ing' e' tu' seurak' ri. Yam puc e' ri heul' hk'ai' ka ná', e' ku un' cang ti keunhaw' hot' ri heul'. ⁸ E' lawn kue' ku' hk'a' ku' som' maeé' hk'ohk'eung ko', a hit' hpum' e'. ⁹ Peue sum' meuneum ná' hk'uic' ce hk'a'naeé' ku' cop'long maeé' saeé'pan ka tá'nhá' ngá' suisa hk'o'lhát' ku' kaw ol' peue hk'uic' hk'a'naeé' vang lulaic' ná'. ¹⁰ Kopti leumeus' leumuil ná' meuh a kleum' ka ku' rai ná' gawm'euc' ka. Kopti leumeus' leumuil ná', peue ngon' ná' peue kleuc' hk'a' ka hk'a' yum' ná', ce sawt' meun ri ri ku' kuit nyhap' heun' ceu ná'.

Peueng' suik' pun hk'a' yum'

¹¹ Peue Eun Peucawó' ná' mi vel ceu nang aen' ce reu'. Daecti sok mi hot' ku' leupaws seumeu', hkopyawm'

Peucawó Eun, hk'a'yum', hk'a'leumeus'keus, yeun'hkam, maeé' hpum' onawn' ná. ¹²Peueng' suik' chak' pun hk'a'yum' ná. Cit' tip' áyu tip' cot'cu ku' Peucawó' klawng Eun ri kah mi rap ri ti yam hkam' mi sa'hki' chak' nanggal' ce peue meuh sa'hki' heun' peue ná, jhawp' a meulamlam ri reu'. ¹³Nanggal' Eun Peucawó' Cawó' tuil' áyu ri ku ceu ná Eun maeé' nanggal' Eun Yesu' Hkrit Cawó' hkam' sa'hki' chak' nanggal' eun cawó' Pontias' Pí'lat ná Eun, uí' kaw tuil' leukah' ri mi, ¹⁴rot ti yam Cawó' e' Yesu' Hkrit tang puc Eun ri lih ná, roksa' leukah' tuil' Eun aen' ce meulamlam ri, pawlaee va a kue' vang kleuc' ku' lah' ku' ris. ¹⁵Yam ka Yesu' kaw Eun tang pucti lih ná, kaw a meuh hk'a'naee yam Eun Peucawó'. Peucawó' meuh Eun Cawó' kuing' ri suk'seun'. Heun ri koe meuh Eun Cawó' u'peung, Eun meuh Hkun'haw'hkam' hk'a'pang' hkun'haw'hkam', Cawó' hk'a'pang' cawó'. ¹⁶Heun ri koe áyu im' Eun cot'cu. Eun ut' hk'a'naee ku' ceng' ku' ánhaw' un' cang lec ka ná. Heun ri kó', ánhaw' hkuin' duing nyu hkuin' cang nyu Eun. Kah Eun kue' munhpung' tí'ca cot'cu ri reu'. Amin.

¹⁷Tuil' leukah' ri peue meuneum ut' nang lok maet'-maen' ná ce. Un' kah ce hpum' keuting mhawng' ri keutuí' hpum' vahtu' hk'il' leumuil cang lulaic ná, daecti kah ce keutuí' hpum' Peucawó' Cawó' mhe' ri uin' ku ceu gawm'euc' a meuh ku' ren'kawn pun e' ná Eun. ¹⁸Kah ce yeuh ku' chak', meuneum ri yeuh ku' chak', hpum' vahveung gvah puri reu'. ¹⁹Yeuh keutit' ná kó', meuh a sawng' yeuh ri roksa' hk'il' leumuil pun tu' ri meun nang kuing' pang' mao'. Punta kaw ce pun áyu neumneum ná, a meuh kleum' keutawn' pun cu hk'a' cat ná.

²⁰Tí'mó'se, roksa' ku' ap ri ri mi ná meulamlam ri. Vel leukah' rishk'i un' kue' mun' ná maeé' kamkuit kleuc' hteum' ri pun cú'yi ná. ²¹Peue ngon' ná kopti rap ce ri ti kamkuit aen' a ná, ce kleuc' hk'a' ka hk'a'yum' ná. Kah

1 Tímo'se 6:21

13

1 Tímo'se 6:21

mun' sin' Eun Peucawo' a kue' ri pé.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 19 Oct 2021 from source files dated 14 Jul
2021

0468b0b5-acb2-59c4-92d3-4fa09a4d091c